



Llywodraeth Cymru
Welsh Government

Pecyn gwybodaeth i ymgeiswyr

Comisiwn Brenhinol Henebion Cymru

Penodi Comisiynwyr

Dyddiad cau: 16 Medi 2018



**The Commissioner for
Public Appointments**

Comisiwn Brenhinol Henebion Cymru

Cynnwys

Gwneud Cais

Atodiad A: Rôl Comisiynydd

Atodiad B: Rôl a chyfrifoldebau Comisiwn Brenhinol
Henebion Cymru

Atodiad C: Y broses ddethol

Comisiwn Brenhinol Henebion Cymru

Gwneud cais

Diolch am ddangos diddordeb mewn cael eich penodi'n un o Gomisiynwyr Comisiwn Brenhinol Henebion Cymru. Mae dwy sydd wag, ac mae angen maes arbenigedd penodol (a ddisgrifir ym manyleb y person) ar gyfer bob un ohonynt. Bydd pob Comisiynydd yn chwarae rhan flaenllaw drwy gynnig her adeiladol ar draws holl fusnes y Comisiwn Brenhinol er mwyn sicrhau y creffir ar bob agwedd ar ei strategaeth, ei gyfeiriad a'i ddulliau cyflenwi er mwyn gwneud yn siŵr eu bod yn effeithiol ac yn effeithlon. Mae'r Atodiadau yn rhoi manylion am rôl Comisiynydd a manyleb y person ar ei gyfer, am rôl a chyfrifoldebau'r Comisiwn Brenhinol ac am y broses ddedol.

I wneud cais, ewch i wefan penodiadau cyhoeddus Llywodraeth Cymru: <https://cymru-wales.tal.net/vx/lang-cy/mobile-0/appcentre-3/brand-2/xf-458397f863d7/candidate/jobboard/vacancy/7/adv/>

I wneud cais am y rôl hon, cliciwch ar swydd wag 'Comisiynwyr – Comisiwn Brenhinol Henebion Cymru' a cliciwch ar 'Gwneud Cais' yn y gornel chwith isaf. Y tro cyntaf ichi wneud cais am swydd, bydd angen ichi lenwi ffurflen gofrestru ar gyfer system ceisiadau ar-lein Llywodraeth Cymru. Dim ond unwaith y bydd angen ichi gofrestru, a thrwy wneud hynny byddwch yn gallu dilyn hynt eich cais, ac unrhyw geisiadau eraill a wnewch, drwy'ch cyfrif cofrestredig.

Ar ôl ichi gofrestru, byddwch yn gallu cael gweld y ffurflen gais. I wneud cais, bydd angen ichi lanlwytho datganiad personol a CV i'r adran 'Rhesymau dros ymgeisio' ar y ffurflen gais ar-lein.

Datganiad Personol

Y datganiad personol yw'ch cyfle i 1) amlinellu eich diddordeb yn y rôl, 2) dangos sut rydych yn bodloni pob un o'r meini prawf a restrir ym manyleb y person a 3) amlinellu sut y gallech gyfrannu at waith y Comisiwn Brenhinol. Chi sydd i benderfynu sut i gyflwyno'r wybodaeth. Fodd bynnag, dylech anelu at ddarparu enghreifftiau manwl sy'n dangos sut y mae'ch gwybodaeth a'ch profiadau yn cyd-fynd â phob maen prawf (a rennir yn 'arbenigedd hanfodol' a 'sgiliau personol hanfodol'), ac sy'n disgrifio'ch cyfraniad chi at gyflawni canlyniad penodol. Bydd hefyd o fudd i'r panel dethol os gallwch nodi'n glir pa dystiolaeth benodol sy'n berthnasol i ba faen prawf. Mae rhoi paragraffau ar wahân ar gyfer pob maen prawf yn arfer cyffredin.

Ni ddylai'r datganiad personol fod yn fwy na dwy dudalen. Gallai'ch cais gael ei wrthod pe baech yn mynd dros y terfyn hwnnw.

CV

Dylech sicrhau bod eich CV yn cynnwys manylion bras eich swydd bresennol neu eich swydd ddiweddaraf a'ch dyddiadau yn y swydd honno. Nodwch unrhyw benodiadau Gweinidogol a fu gennych yn y gorffennol neu sydd gennych ar hyn o bryd.

Amserlen fras

Dyddiad cau:	16 Medi 2018
Llunio rhestr fer:	16 Hydref 2018
Cyfweliadau:	27 a 28 Tachwedd 2018

Comisiwn Brenhinol Henebion Cymru

Datganiad Amrywiaeth

Mae Llywodraeth Cymru o'r farn y dylai aelodau byrddau cyrff cyhoeddus adlewyrchu'r gymdeithas yng Nghymru – pobl o bob cefndir – er mwyn eu helpu i ddeall anghenion pobl a gwneud penderfyniadau gwell. Dyna pam y mae Llywodraeth Cymru yn annog amrywiaeth eang o unigolion i wneud cais i fod yn aelodau o gyrff cyhoeddus. Rydym yn croesawu'n arbennig geisiadau gan bob grŵp sydd heb gynrychiolaeth ddigonol gan gynnwys menywod, pobl dan 30 oed, pobl o gefndir du, Asiaidd ac o leiafrifoedd ethnig, pobl anabl a phobl lesbiaidd, hoyw, deurywiol a thrawsryweddol.

Cynllun Gwarantu Cyfweiliad – Yn Gadarn o Blaid Pobl Anabl

Mae gan Lywodraeth Cymru gynllun Cadarn o Blaid Pobl Anabl ac mae'n croesawu ceisiadau gan bobl ag anabledau. Mae'r cynllun yn gwarantu cyfweiliad i bobl anabl os ydynt yn bodloni'r meini prawf sylfaenol ar gyfer y swydd. Mae'r ffurflen gais hefyd yn gyfle ichi nodi unrhyw anghenion neu offer penodol y gallai fod eu hangen arnoch os cewch eich gwahodd i gyfweiliad.

Manylion Cyswllt:

Am ragor o wybodaeth am rôl Comisiwn Brenhinol Henebion Cymru a rôl y Comisiynwyr, cysylltwch â:

Christopher Catling, yr Ysgrifennydd (Prif Swyddog Gweithredol)

Ffôn: 01970 621 200

E-bost: christopher.catling@rcahmw.gov.uk

Os oes angen rhagor o gymorth arnoch i wneud cais am y swydd hon, anfonwch e-bost at: PenodiadauCyhoeddus@llyw.cymru.

Penodi Comisiynwyr i Gomisiwn Brenhinol Henebion Cymru

Disgrifiad o'r rôl a manyleb y person

Rôl a chyfrifoldebau

Bwrdd y Comisiynwyr sy'n arwain ac yn llywodraethu'r sefydliad, ac mae hefyd yn craffu ar bob un o weithgareddau'r Comisiwn Brenhinol, yn ogystal â herio'r gweithgareddau hynny mewn ffordd adeiladol. Y Bwrdd hefyd sy'n llywio dyfodol y sefydliad. Mae'r Comisiwn Brenhinol yn awyddus i benodi unigolion sy'n ymrwymedig i ddarparu'r gwasanaeth amgylchedd hanesyddol gorau posibl er budd holl bobl Cymru.

Fel Comisiynydd, byddwch yn:

- Adolygu Cynllun Gweithredol y Sefydliad, gan ystyried gwaith sy'n mynd rhagddo, cyfarwyddiadau Llywodraeth Cymru yn y Llythyr Cylch Gwaith a mentrau a sefydlir gan y Sefydliad ei hun;
- Sicrhau bod y Sefydliad yn cael ei lywodraethu mewn ffordd sy'n cydymffurfio â gofynion y ddogfen Fframwaith, a bod gweithgareddau'r Sefydliad o fewn cwmpas y Warrant Frenhinol;
- Sicrhau bod perfformiad y Sefydliad yn cyrraedd yr hyn sy'n ofynnol gan Lywodraeth Cymru a bod adroddiad yn cael ei gyhoeddi'n flynyddol am weithgareddau'r Sefydliad;
- Cynnig arweiniad a chyfarwyddyd i staff arbenigol y Sefydliad, a monitro'u gwaith, mewn pwyllgorau neu'n unigol;
- Ymwneud yn uniongyrchol â'r hyn sy'n cael ei gynnwys yng nghyhoeddiadau arbenigol y Sefydliad, a chymryd cyfrifoldeb amdanynt;
- Cynrychioli'r Comisiwn Brenhinol a'i fuddiannau pan fydd galw arnoch i wneud hynny.

Disgwylir i'r Comisiynwyr hefyd:

- Feddu ar ddealltwriaeth o'r amgylchedd hanesyddol a'i arwyddocâd;
- Bod â gweledigaeth glir am sut y gall y Comisiwn Brenhinol barhau i weithio gyda phartneriaid allweddol i ddarparu'r gwasanaeth amgylchedd hanesyddol gorau posibl i Gymru;
- Arwain Bwrdd Comisiynwyr sy'n perfformio ar lefel uchel ac sy'n rheoli perfformiad mewn ffordd gadarn, sy'n dangos yr ymddygiadau a'r gwerthoedd craidd y mae eu hangen mewn tîm, sy'n herio ac yn cefnogi ei gilydd mewn ffordd adeiladol, ac sy'n mynd ati'n barhaus i fesur llwyddiannau'r tîm yn unol â nodau'r Comisiwn;
- Arddel a chynnal saith egwyddor bywyd cyhoeddus ("egwyddorion Nolan").

Comisiwn Brenhinol Henebion Cymru

Manyleb y Person

Er mwyn cael eich ystyried, rhaid ichi allu dangos bod gennych y rhinweddau, y sgiliau a'r profiad i fodloni pob un o feini prawf hanfodol (a rennir yn 'arbenigedd hanfodol' ac yn 'sgiliau personol hanfodol') y rôl.

Meini Prawf Hanfodol

Mae'r Comisiwn Brenhinol wedi ymrwymo i atgyfnerthu ei fwrdd ac i gyflwyno amrywiaeth o ran yr aelodau, felly rydym yn chwilio am Gomisiynwyr newydd a fydd â chryn arbenigedd mewn un neu fwy o'r meysydd a ganlyn:

1. Pensaerniaeth yr ugeinfed ganrif: Fwyfwy, mae adeiladau sy'n dyddio o'r ugeinfed ganrif yn cael eu bygwth gan ailddatblygu, ac mae manau addoli, ysgolion, ysbytai, blociau tai, canolfannau hamdden, ffatrioedd ac adeiladau dinesig yn cael eu cau. Y duedd yw nad yw adeiladau o'r cyfnod hwn yn cael eu hastudio gymaint ag adeiladau hanesyddol hyn ac nad oes cystal dealltwriaeth ohonynt; hefyd, mae angen dealltwriaeth o dechnegau adeiladu sy'n hanfodol wahanol i dechnegau adeiladu traddodiadol.

Mae'r agwedd hon ar waith y Comisiwn Brenhinol yn tyfu ac, felly, rydym yn awyddus i recriwtio Comisiynydd sydd â dealltwriaeth gadarn o adeiladau a thechnegau adeiladu'r cyfnod ac sydd â'r weledigaeth strategol i'n helpu i flaenoriaethu'n gwaith a chynghori'r Comisiwn ar arwyddocâd posibl mathau o adeiladau, adeiladau unigol a thirweddau a gynlluniwyd.

2. Treftadaeth forol: Y Comisiwn Brenhinol sy'n cadw cofnod morol Cymru, sy'n ymwneud â'r môr hyd at derfyn eithaf ardal Cynllun Morol Cymru ac sy'n cynnwys amrywiaeth eang o asedau sy'n gysylltiedig â threftadaeth forol, gan gynnwys tirweddau tanfor a llongau ac awyrennau a gollwyd ar y môr. Rydym wrthi ar hyn o bryd yn cymryd rhan mewn prosiectau o bwys i goffáu llongau a gollwyd yn ystod y Rhyfel Mawr ac i edrych ar effeithiau'r newid yn yr hinsawdd ar dreftadaeth arfordirol a threftadaeth dandwr basn Môr Iwerddon. Ni sy'n gyfrifol am gynnig cyngor a chymorth i Cyfoeth Naturiol Cymru a'r Gweinidog Diwylliant, Twristiaeth a Chwaraeon mewn cysylltiad â phenderfynu ar yr effeithiau posibl a gaiff datblygiadau ar y môr, megis cloddio am agregau yn y môr, cynhyrchu ynni'r llanw ac ynni gwynt, a datblygiadau mewn porthladdoedd a harbyrau. Rydym yn gysylltiedig hefyd â gwaith i lywio polisïau ar dreftadaeth ddiwylliannol forol sy'n cael eu datblygu yn yr ardal forol.

Rydym yn awyddus, felly, i recriwtio Comisiynydd sydd â phrofiad yn y maes i gynghori'r Comisiwn am flaenoriaethau strategol er mwyn sicrhau bod arwyddocâd treftadaeth forol Cymru yn cael ei ddeall, ei hyrwyddo a'i ddiogelu'n ddigonol.

Sgiliau Personol Hanfodol

Bydd angen i ymgeiswyr hefyd ddangos bod ganddynt:

- Sgiliau deallusol a dadansoddol cadarn;
- Y gallu i gynrychioli'r Comisiwn Brenhinol yn gyhoeddus a chyfathrebu'n effeithiol â rhanddeiliaid allweddol;
- Dealltwriaeth o'r cymunedau amrywiol yng Nghymru ac ymrwymiad i rannu'r manteision sy'n gysylltiedig ag ymwneud â threftadaeth Cymru;

Comisiwn Brenhinol Henebion Cymru

- Y gallu i gydweithio'n effeithiol, ac i weithio gydag eraill, a thrwyddynt, i gyflawni amcanion;
- Y gallu i gyflwyno syniadau newydd mewn trafodaethau am faterion strategol ac ymarferol.

Y Gymraeg

Mae'r gallu i gyfathrebu yn Gymraeg yn ddymunol ar gyfer o leiaf un o'r swyddi. Hoffai'r Comisiwn gryfhau'r sefyllfa o ran sgiliau Cymraeg ar y Bwrdd. Fodd bynnag, dylai ymgeiswyr ddangos bod ganddynt ymwybyddiaeth o bwysigrwydd y Gymraeg mewn Cymru ddwyieithog, gan werthfawrogi polisïau a strategaethau iaith y Comisiwn Brenhinol.

Ffeithiau allweddol am y swydd

Lleoliad: Fel arfer, cynhelir cyfarfodydd yn Aberystwyth, ond mae'n bosibl y byddant yn cael eu cynnal mewn rhannau eraill o Gymru o bryd i'w gilydd.

Ymrwymiad Amser: Mae'r ymrwymiad amser swyddogol yn rhyw 10 diwrnod y flwyddyn ar gyfartaledd, ond gellir treulio mwy o amser na hynny ar waith paratoi.

Bydd disgwyl i'r comisiynwyr fod yn bresennol mewn dau gyfarfod y flwyddyn, fel arfer ym mis Hydref a mis Ebrill Mae pob cyfarfod yn para naill ai deuddydd neu dridiau, a chynhelir cyfarfodydd achlysurol hefyd os bydd y Comisiynwyr yn cytuno y bydd eu hangen. Yn achos y rheini a fydd yn aelodau craidd o'r Pwyllgor Llywodraethu Corfforaethol, mae hyn yn cynnwys cymryd rhan mewn cyfarfodydd telegynadleda ychwanegol ym mis Ionawr a mis Gorffennaf.

Bydd angen i'r Comisiynwyr fod yn barod i ddarllen deunydd cefndir, i gynrychioli'r Comisiwn Brenhinol rhwng cyfarfodydd, i fod yn aelod o baneli cyfweld ac yn aelod o gyrff adolygu strategol o bryd i'w gilydd ac, o bosibl, asesu testunau sydd i'w cyhoeddi.

Cyfnod y swydd: Penodir am gyfnod o 5 mlynedd; gellir ailbenodi am gyfnod pellach o 5 mlynedd.

Cydnabyddiaeth ariannol; £198 y diwrnod am fynd i gyfarfodydd, ynghyd â chostau teithio a threuliau rhesymol eraill sydd o fewn y terfynau cydnabyddedig. Efallai y byddwch hefyd yn gymwys i hawlio ad-daliad am gostau sy'n gysylltiedig â gofal plant/gofal yr henoed/gofalwr cynorthwyol tra byddwch yn gweithio ar ran y Comisiwn Brenhinol.

Pwy sy'n gymwys i wneud cais?

Dylai ymgeiswyr nodi bod swydd fel un o Gomisiynwyr Comisiwn Brenhinol Henebion Cymru yn anghymwys o'r deiliad rhag bod yn aelod o Gynulliad Cenedlaethol Cymru o dan Orchymyn Cynulliad Cenedlaethol Cymru (Anghymhwys) 2015.

<http://www.legislation.gov.uk/ukxi/2015/1536/contents/made>

Comisiwn Brenhinol Henebion Cymru

Gwrthdaro Buddiannau

Gofynnir ichi ddatgan unrhyw fuddiannau preifat a allai fod, neu y gellid dehongli eu bod, yn gwrthdaro â'ch rôl a'ch cyfrifoldebau fel un o Gomisiynwyr y Comisiwn Brenhinol, gan gynnwys buddiannau busnes neu swyddi o awdurdod y tu allan i'ch rôl yn y Comisiwn Brenhinol.

Bydd unrhyw wrthdaro buddiannau yn cael ei drafod yn y cyfweiliad. Os byddwch yn cael eich penodi, bydd gofyn ichi hefyd ddatgan y buddiannau hyn ar gofrestr sydd ar gael i'r cyhoedd.

Safonau mewn bywyd cyhoeddus

Bydd disgwyl ichi arddel safonau uchel o ymddygiad corfforaethol a phersonol. Bydd gofyn i bob ymgeisydd llwyddiannus gadw at y Cod Ymddygiad ar gyfer Aelodau Byrddau Cyrff Cyhoeddus; mae'r ddogfen honno i'w gweld yma:

<http://www.bl.uk/aboutus/governance/blboard/Board%20Code%20of%20Practice%202011.pdf>

Rôl a chyfrifoldebau Comisiwn Brenhinol Henebion Cymru

Mae Comisiwn Brenhinol Henebion Cymru yn wasanaeth archifo ac archwilio cenedlaethol annibynnol unigryw i Gymru, ac mae'n ymroi i gofnodi a dehongli'n hamgylchedd hanesyddol cyfoethog mewn ffordd awdurdodol. Mae'n gweithio o adeilad Llyfrgell Genedlaethol Cymru yn Aberystwyth ac yn gweithredu hyd braich oddi wrth Lywodraeth Cymru, ac mae ganddo staff medrus sy'n rhoi cyngor proffesiynol a gwybodaeth arbenigol i'r cyhoedd. Rydym yn ymrwymedig i ddarparu'r gwasanaeth gorau posibl i Gymru, gan feithrin gwell gofal a dealltwriaeth o'n hadeiladau a'n tirweddau hanesyddol, a meithrin a chydabod y potensial sydd gan dreftadaeth i helpu i wella bywydau pobl.

Cefndir

Mae hanes hir gan y Comisiwn Brenhinol yng Nghymru. Cafodd ei sefydlu ym 1908 drwy Warrant Frenhinol, a ddiwygiwyd yn 2000. Mae'r Warrant yn cyfarwyddo'r Comisiwn Brenhinol i arolygu a chofnodi henebion ac adeiladwaith sy'n dyddio o'r cyfnod cynharaf (gan gynnwys yr henebion a'r adeiladwaith yng ngwely'r môr, arno neu oddi tano) drwy gasglu, cynnal a churadu Cofnod Henebion Cenedlaethol Cymru, sef y cofnod cenedlaethol sylfaenol o'r amgylchedd archaeolegol a hanesyddol.

Mae'r Comisiwn Brenhinol yn Gorff a Noddir gan Lywodraeth Cymru a nodir ei rôl a'i gyfrifoldebau yng Ngwarant Frenhinol 2000. Nodir ein trefniadau llywodraethu a'n trefniadau atebolrwydd mewn Dogfen Fframwaith. Caiff blaenoriaethau gweithredol a thargedau perfformiad y Comisiwn Brenhinol eu llywio gan Lythyr Cylch Gwaith blynyddol oddi wrth y Gweinidog Diwylliant, Twristiaeth a Chwaraeon. Mae'r llythyr hwnnw'n nodi blaenoriaethau strategol, polisiau penodol a chynlluniau gweithredu, a pholisiau a gweithdrefnau ehangach Llywodraeth Cymru.

Rôl y Bwrdd

Mae Bwrdd y Comisiynwyr yn arwain ac yn llywodraethu'r sefydliad, ac yn craffu ar holl weithgareddau'r Comisiwn, yn ogystal â herio'r gweithgareddau hynny mewn ffordd adeiladol. Y Bwrdd hefyd sy'n llywio dyfodol y sefydliad.

Mae Bwrdd y Comisiynwyr yn cynnwys Cadeirydd a hyd at ddeg Comisiynydd arall. Mae naw Comisiynydd ar hyn o bryd, gan gynnwys y Cadeirydd, Dr Eurwyn Wiliam. Y Comisiynwyr eraill yw: Catherine Hardman (Is-gadeirydd), Thomas Lloyd, Caroline Crewe-Read, Dr Louise Emanuel, Neil Beagrie, Chris Brayne – a'r Athro Chris Williams a Dr Mark Redknap, sydd ill dau yn tynnu at derfyn eu cyfnod yn y swydd.

Comisiwn Brenhinol Henebion Cymru

Y broses ddethol

Bydd y panel cyfweld yn asesu CV a datganiad personol pob ymgeisydd i benderfynu pwy sy'n bodloni'r meini prawf ar gyfer y rôl orau, a phwy fydd yn cael eu gwahodd i gyfweiliad. Bydd y panel yn dibynnu ar yr wybodaeth yn eich CV a'r datganiad i asesu a oes gennych y sgiliau a'r profiad gofynnol. Cofiwch wneud yn siŵr eich bod yn darparu tystiolaeth i ddangos sut rydych yn bodloni pob un o'r meini prawf hanfodol.

Hyd yma, ni chadarnhawyd pwy fydd ar y panel dethol, ond bydd yr ymgeiswyr a fydd yn cyrraedd y rhestr fer yn cael gwybod eu henwau a'u swyddi ar y bwrdd cyn y cyfweiliad.

Gan ddibynnu ar nifer y ceisiadau a ddaw i law, efallai y bydd eich cais yn cael ei roi ar restr hir cyn cael ei roi i'r panel sy'n llunio rhestr fer i'w ystyried. Dylech fod yn ymwybodol efallai na fydd eich cais yn cael ei ystyried yn llawn gan y panel cyfan mewn sefyllfa fel hon.

Rydym yn rhagweld y bydd y panel wedi penderfynu yn ystod mis Hydref 2018 pwy fydd yn cael eu gwahodd i gyfweiliad ar 27 / 28 Tachwedd 2018.

Yr unig ymgeiswyr a fydd yn cael eu gwahodd i gyfweiliad fydd yr ymgeiswyr cryfaf a fydd, ym marn y panel, wedi dangos eu bod yn bodloni orau y meini prawf ym manyleb y person. Fodd bynnag, os ydych wedi gwneud cais o dan y cynllun gwarantu cyfweiliad, a'ch bod yn bodloni'r meini prawf hanfodol ar gyfer y swydd, cewch chithau hefyd eich gwahodd i gyfweiliad.

Os cewch eich gwahodd i gyfweiliad ac nad yw'r dyddiad eisoes wedi'i nodi yn y pecyn gwybodaeth hwn, byddwn yn ceisio rhoi cymaint o rybudd â phosibl ichi am ddyddiad y cyfweiliad. Os na allwch fod yn bresennol ar y dyddiad hwnnw, byddwn yn ceisio ad-drefnu ond efallai na fydd hynny'n bosibl oherwydd cyfyngiadau amser o fewn yr amserlen benodi neu oherwydd na fydd y panel dethol ar gael.

Byddwch yn cael neges e-bost drwy system Penodi i roi gwybod ichi a fyddwch yn cael eich gwahodd i gyfweiliad ai peidio. Ein bwriad yw cynnal cyfweiliadau yn swyddfeydd y Comisiwn Brenhinol yn Aberystwyth.

Os cewch eich gwahodd i gyfweiliad, bydd y panel yn eich holi am eich sgiliau a'ch profiad ac yn gofyn cwestiynau penodol i asesu a ydych yn bodloni'r meini prawf a bennwyd ar gyfer y swydd ai peidio.

Penodir y Cadeirydd gan y Frenhines o dan y Warrant Frenhinol yn unol â chyngor Prif Weinidog y DU, sy'n gweithredu drwy ymgynghori â'r Ysgrifennydd Gwladol a Gweinidogion Cymru. Mae Adran 62 o Ddeddf Llywodraeth Cymru 2006 yn galluogi Gweinidogion Cymru i gyflwyno sylwadau priodol am unrhyw fater sy'n effeithio ar Gymru. Felly, caiff argymhellion am benodiadau i'r Comisiwn Brenhinol eu gwneud i Brif Weinidog y DU gan y Gweinidog Diwylliant, Twristiaeth a Chwaraeon, sef y Gweinidog perthnasol o blith Gweinidogion Cymru, sy'n cael ei gynghori ar y mater hwn gan swyddogion.

Bydd yr ymgeiswyr y bydd y panel yn credu sy'n addas i'w penodi yn cael eu hargymhell i'r Gweinidogion, a fydd yn gwneud yr argymhelliad terfynol. Mae'n bosibl y

Comisiwn Brenhinol Henebion Cymru

bydd y Gweinidog yn dewis cyfarfod â'r ymgeiswyr hyn cyn gwneud penderfyniad. Bydd bwllch amser rhwng y cyfweiliad a'r penderfyniad penodi terfynol. Byddwn yn rhoi gwybod i'r ymgeiswyr a fydd wedi cael cyfweiliad am hyn y broses hon.

Os byddwch yn llwyddiannus, cewch lythyr yn eich penodi'n un o Gomisiynwyr Comisiwn Brenhinol Henebion Cymru, ac yn cadarnhau telerau'r penodiad.

Os na fyddwch yn llwyddiannus ar ôl cael cyfweiliad, bydd Llywodraeth Cymru yn rhoi gwybod ichi. Rydym yn gwerthfawrogi bod angen llawer o amser ac ymdrech i ymgeisio am rolau a bod rhoi adborth yn rhan werthfawr o'r broses. O'r herwydd, bydd y llythyr yn rhoi manylion yr unigolyn y gallwch gysylltu ag ef i gael adborth ar eich cyfweiliad a'ch cais, os byddwch yn dymuno gwneud hynny.

Ymholiadau a chwynion

Os oes gennych unrhyw ymholiadau am eich cais neu os ydych am wneud cwyn, anfonwch e-bost at: PenodiadauCyhoeddus@llyw.cymru.